



28. april 2022

UPA2022/53/54

**Mitit piniarneqartarnerisa sivitsorneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens NapätôK', Naleraq)

**Kitaani kangianilu piffissami aalajangersimasumi mitit manniinik katersisarnermik ammaassisoqarnissaannik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.**

(Inatsisartuni ilaasortaq Jens NapätôK', Naleraq)

Immikkoortoq 53-imut;

Siumumiit Inatsisartunut ilaasortaq Jens NapatoK qutsavigaarput siunnersuuteqarmat mitit piniagaanerisa sivitsorneqarnissaat pillugu.

Siunnersuummut tunngavilersuutaasoq paasilluarsinnaavarput, tassa nunatta pissaritari uumassusillit eqqarsaatigalugit immitsinnut nerisaqarnikkut pilersornerput pitsaasumik sunniutilimmillu innuttaasut eqqarsaatigalugit sunniuteqassappat kiisalu timmiaqatigiit pineqartut amerlassusaat eqqarsaatigalugit isumannaatsumik inissisimappata, iluaqutigineqarnissaat avaqqunneqarsinnaanngimmat.

Mitit amerlassusaat 2001-mi missingiunneqarpoq 12-15.000 missaaniissasut, kiisalu 2012-mi amerleriapiloorlutik naatsorsorneqarsimapput 80-90.000-missaaniilersimasut<sup>1</sup>. Aammalu ullumikkumut ilisimasat takusartakkallu eqqarsaatigalugit ilimagilluinnarparput mitit amerlassusaat suli annertuumik amerleriaateqarsimassasut.

Siunnersuuteqartup ilanngullugu tikippaa ukiuunerani pilinissamut tunngatillugu piniagaaffiisa nalileqqinnissaat. Tamanna tunngaviatigut taperserparput, kissaatigalutigulu piniarnermik siunnersooqatigiit kiisalu Kattuffik susassaartoq qanimut suleqatigalugit qanoq pitsaanagerusumik aaqqiinissaq suliarineqassasoq.

Maanna mitit Zone-kkaartumik piniarneqarnerat ingerlanneqarpoq, Zone 1(Avanersuaq) aamma Zone 2 (Upernaviup avannaaniit -Uummanaq ilanngullugu) 15.oktober - 30. april ilanngullugu kiisalu Zone3 (Qeqertarsuup tunuaniit-Kujataa ilanngullugu) aamma Zone4 (Nunatta kangia) 15. oktober-31. marts ilanngulugu piniarneqartarput, taamaamat piniagaanerat sivitsussappat piffik piukkunnarnerpaasoq tassaasinnaavoq ukiaanerani piniagaaffiisa siuartineqarnissaat. Tassami upernaanerani nuliartarnerat, manniliortarnerat, kiisalu piaqqaminnik nerisitsisarnerata nalaanni eqqissisimatinneqarnissaat avaqqunneqarsinnaanngimmat.

Siumumiit kissaatigaarput mitit piniagaanerisa sivitsorneqarnissaat nuna tamakkerlugu atuuttariaartoq.

---

<sup>1</sup> Sermitsiami allaaserisaq 25 Oktober 2013



Taamatut oqaaseqarluta siunnersuut ataatsimiititaliamut susassaqtumut ingerlateqqinneqarnissaa innersuussutigaaqput, ataatsimiititaliarlu sulilluarnissaanik Siumumiik kissaapparput.

Immikkoortoq 54-imut;

Siumumiit siunnersuuteqartoq Jens NapatoK Naleraq qutsavigaarput.

Siunnersuut tunngaviatigut Siumumiit taparserparput, maluginiarparpullu mitinik killilersuisimanerup kingunera pitsaasumik miteqassuseq eqqarsaatigalugu annertuumik siuarlaateqarsimasoq.

Ilisimavarput siusinnerusumi annertuumik mitit manni sinerissami nerisaalluartartut. Killilersuinerulli eqqunnerani tamanna periuseq ukiopassuarni inuiaqatigiinni atugaasimasoq piujunnarsimavoq. Tassalu kinguaariit tullinut periutsip ingerlateqqissinnaanera ajornakusoortorujussuusimalluni, naak siusinnerusumi nerisaqarnikkut qularnanngitsumik siammasissumik innutaasunut iluaqutaalluarteraluarluni.

Maanna piffissanngorsimavoq mannissarsinnaanerup eqquteqqinneqarnissaa, tamanna mianerinnilluni ingerlanneqartariaqarpoq. Kissatiginarporlu Zoneni tamani piffik mannilioqqaarfik eqqarsaatigalugu annerpaamik ullunik 14-nik sivisussusilimmik mannissarniarternerup eqqunneqarnissaa taamaasilluni qulakkeerneqassamat mitit aappasaanik manniliornissamat periarfissaqarnissaat qulakkeerumallugu.

Piniarfiit tamaasa Zonekkaartut uani pivagut.

Taamatut oqaaseqarluta ataatsimiititaliamut susassaqtumut ingerlateqqinneqarnissaa innersuussutigaaqput, ataatsimiititaliarlu sulilluarnissaanik Siumumiit kissaallugu.

Jens Kristian Therkildsen, Siumut